



BAKOM
Divisiun Medias
Zukunftstrasse 44
2501 Bienna

Turitg, 16 da schaner 2024

Posiziun da la Pro Svizra Rumantscha en connex cun la consultaziun da la revisiun parziala da l'Ordinaziun davart radio e televisiun

Stimadas dunnas e preziads signurs

La Pro Svizra Rumantscha s'engascha per il mantegniment e la promoziun da la lingua e cultura rumantscha.

Las producziuns audio-visualas e la purschida online da Radiotelevisiun Svizra Rumantscha èn ina da las pli fermas pitgas da la Rumantschia ed èn centralas per la vitalitad dal rumantsch. Nossa uniun è s'engaschada l'onn 2018 vehementamain cunter l'iniziativa «No Billag» ed ha constatà cun satisfacziun ch'il pievel ha refusà cleramain l'iniziativa che avess gi considerablas consequenzas negativas per nossa lingua e la cohesiun naziunala.

Malgrà quest success ha la SRG SSR instradà dapi lura differentas mesiras da spargn. En cumbinaziun cun il scumond (giustificà) da reclamas online e la chareschia, èsi evident che las purschidas da la SRG SSR e la qualidad da quellas pateschan. Ch'il Cussegl Federal vul en questa situaziun reducir anc ina giada las entradas da la SRG SSR – tranter auter cun sbassar las taxas da 335 sin 300 francs per chasas privatas è nunchapibel e periclitescha tranter auter ils programs ch'èn d'impurtanza existenziala per la lingua e cultura rumantscha. La pli nova reducziun finanziaria planisada chaschunass ina ulteriura sminuziun da la purschida ed ella smanatscha l'existenza da RTR.

La SRG SSR sto tenor la Constituziun federala contribuir a la furmaziun, a la diversitad culturala, a la furmaziun da l'opiniun ed al divertiment. Ella sto resguardar las atgnadads da noss pajais ed ils basegns dals chantuns. Il service public medial è en Svizra in servetsch a la societad. Ma la decisiun da spargn planisada periclitescha quest servetsch cunzunt per las minoritads linguisticas.

Era la gulivaziun finanziaria da la SRG SSR tranter las regiuns linguisticas fiss en privel. Las regiuns linguisticas pli pitschnas vegnissan sut las rodas. En las regiuns perifericas na datti ni in public grond avunda ni la reclama necessaria per producir las emissiuns ch'èn colliadas cun gronds custs fixes. Reportaschas rumantschas equilibradas davart eveniments locals e regiunals fissan periclitadas.

Era in sguard en auters pajais mussa tenor noss avis quant valurusas che nossas medias dal dretg public èn. Ina dominanza da medias radicalisadas che rinforzan la separaziun da la societad en cumbinaziun cun ina erosiun da la qualitat n'ans paran nagina finamira desiderabla per la Svizra. Nus appellain perquai da risguardar la quadrilinguitad da nossa terra e da far il pussaivel per mantegnair la qualitat da nossas medias dal dretg public e da desister da questa revisiun parziala da l'Ordinaziun davart radio e televisiun (ORTV).

Cordials salids
la suprastanza da la Pro Svizra Rumantscha